



partii naleraq

UKA 2015/49-01

05.11.2015

Ilinniartut Kalaallit Nunaata avataani ilinniartut naammassereernermik kingorna ukiut qulit angullugit Kalaallit Nunaannut uteqqittannginnerat kiisalu ilinniartut naammassereerlutik Kalaallit Nunaannut uteqqikkumasanninnerannut pissutaasut pillugit misissuinissamut aallartitseggullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinerup kinguneranik uterartitsinissaq pillugu iliuusissamik pilersaarusiortoqassaaq, kalaallit ilinniartut naammassereerlutik Kalaallit Nunaannut uteqqittarnissaminnut kajumissuseqalernissaannut kammattuutaasussamik.
(Inatsisartunut ilaasortaq Randi Vestergaard Evaldsen, Demokraatit)

Inatsisartunut ilaasortap Randi Vestergaard Evaldsenip, Ilinniartut Kalaallit Nunaata avataani ilinniartut naammassereernermik kingorna ukiut qulit angullugit Kalaallit Nunaannut uteqqittannginnerat kiisalu ilinniartut naammassereerlutik Kalaallit Nunaannut uteqqikkumasanninnerannut pissutaasut pillugit misissuinissamut aallartitseggullugit Naalakkersuisut peqquneqarnissaannik Inatsisartut aalajangiiffigisassaattut siunnersuut Partii Naleqqamiit imannak oqaaseqarfigissuarput.

Partii Naleqqamiit politikikkut anguniakkatta pingaartut ilagilluinnarpaat, nunatsinni ilinniarsimassutsip qaffassarneqartuarnissaa. Taamaammat aamma nuannaarutingaarput nunatsinni ilinniarsimasut amerliartornerat, kisianni aamma taamaakkaluartoq nassuerutigisariaqarparput ilinniarsimangitsut suli amerlammata. Taamaattumillu aamma pingaaruteqartorujussuuvoq pisariaqarlunilu, ilinniartuutivut danmarkimut nunanullu allanut ilinniakkaminnut nangitsiartorlutik aallartartut sapinngisamik amerlanerpaat, ilinniakkaminnik naammassereernerminni nunatsinnut utertarnissaat.

Tassami politikikkut taama piunasaqarsinnaaneq minnerpaamik ataatsimik pissutissaqarpoq, tassa ilinniariartortinneqartartut nunatsinniit aningaasalersorneqarsimapput, maannakkut danmarkimi ilinniartut danskit ilinniarnersiutisiaqartitsisarnermut aaliangersagaat naapertorlugit ilinniarnersiuteqalersimasut eqqaassanngikkaanni.

Taamaakkaluartoq Partii Naleqqamiit isumaqarpugut, ilinniartortavut danmarkimiittut nunanilu allaniittut, ilinniareernerup kingorna nunatsinni sulilernissaminnut sapinngisaaq tamaat naapertorlugu

kaammattorneqarlutillu, uternissaannut ullumikkorniit pitsaanerujussuarnik periarfissinneqartariaqartut.

Partii Naleqqamiit isumaqarpugut taamaaliornissatsinnut neqeroortit assigiinngitsut piareersimaffiginissaat kommunit qanimut suleqatigalugit pilersaarusionerqartariaqartoq. Tassani suliffissanik neqerooruteqarluarsinnaaneq, minnerunngitsumillu inissaqarniarnermut aamma meeqqeriveqarnermut tunngasut piareersimaffigineqartariaqarput.

Partii Naleqqamiit nalunngilarput taama iliuuseqarnissaq soorunami aningaasanik naleqartussaavoq, kisianni aningaasat ilinniartitaanermut atornerqartartut kinguneqarluartumik nunatsinnut iluaqutaassappata, ilinniartortavut danmarkimi nunanilu allani ilinniarkkaminnik naammassinnissimasut amerlanerpaat nunatsinni atorluarneqalerpata, taava Partii Naleqqamiit qularutissaanngitsumik takusinnaavarput, maannakkut nunatsinni sulisut tikisitarpassuit aningaasarparujussuarnillu nalillit, maani nunaqavissunik ilinniarsimasunik taarsersorneqalerpata, taava aningaasarparujussuit nunatsinni kaaviiartinneqalerlutillu atorluarneqarnerulernissaat anguneqarsinnaasoq Partii Naleqqamiit qularutiginnilarput.

Taamaammat siunnersuut paasilluarlugu tamakkiisumik taparserparput, suliallu aappassanneerreqannginnerani ataatsimiititaliami susassaqartumi suliarineqarnissaa inassutigalugu.